

PAJTIMI I GJAQEVE

ANTON ÇETTA

Kur e kemi filluar aksionin e shtrimit të dorës së pajtimit, për dy ditë, kemi pajtuar një gjak edhe kemi marrë dy muaj besë. Shumë pak. Megjithatë, kemi qenë të bindur që më vonë do të kemi më shumë suksese. Edhe ja, sukseset po e dëshmojnë. Brenda ditës së sotme Drenica afërsisht njëqind gjaqe po fal. Pse kemi qenë të sigurt, madje edhe u kemi thënë dhe të tjerëve që deri në fund të qershorit shpresojmë se do ta zhdukim këtë plagë të vrazhdë, të zezë? Kemi qenë të sigurt se do t'i kemi këto suksese, pse e kemi ditur që jemi në rrugë të drejtë. Po përkrahim iniciativë fisnike, bujare, të të rinjve studentë të Pejës. Ata e nisën, e ju e përqaftuat këtë iniciativë. E tashmë kemi sukses mbas suksesi, çdo javë nga njëzetë e më shumë. Edhe ne shpresojmë, të gjithë, edhe ju bashkë me ne, që ky vit i 1990-s do të mbesë vit që do të mbahet mend, dhe do të shkruhet edhe në histori. Vit i fundit i gjakmarrjes të shqiptarët. Prandaj ju apeloj, në emër të

aksionit shumë fisnik, që të ndikoni në ato familje, sidomos në rast se i keni në farefisni, keni kumbari me ta, miq, dashamirë, të ndikoni që dhe ata sa më parë t'i bashkohen këtij aksioni, t'i harrojnë armiqësitë e vjetra. Nuk jeto het me armiqësi, nuk jeto het me gjak. T'i shmangeni përgjithësisht madje pushkës v rastare. Një ekonomist i madh anglez thotë: Njeriu prej momentit që lind ka të drejtë në dy sende: të jetojë dhe të punojë. Prandaj, kurrsesi s'kemi të drejtë t'ia marrim jetën tjetrit. Është një dhuratë e natyrës, e ne ligjet e natyrës duhet t'i respektojmë.

Fjalim i mbajtur në Pajtimin e Gjaqeve në Drenicë në 1990